

Date – 09/11/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Naktip, Thawhleghi zing dar 7 atanga Dampa assembly bial bye-election vote thlak tan tur atana campaign theih hun vawiin tlai dar 4 khan a tawp ta.
- 2. Dampa biala bye-election lo awm tura vote an zawnna-ah chief minister Pu Lalduhoma,inthlan dan bawhchhia a puhna hmasa zawk a insawifiahna chu Election Commission of India in a pawmsak lo.
- 3. Red Bull Aizawl Tlangruam buatsaihtu zing ami Yashwi Arora chuan Mizo hnam lam - Cheraw diklo taka a tih bawrhban chungchangah MZP kaltlangin Mizo mipuite hnenah ngaihdam a dil.
- 4. Bihar assembly inthlan thawh hnihna neih tur atana campaign theih hun, vawiin tlai a tawp a, naktip-ah assembly bial 122-ah vote thlak a ni ang.



BYE-POLL CAMPAIGN ENDS

Naktip, Thawhleghi zing dar 7 atanga Dampa assembly bial bye-election vote thlak tan tur atana campaign theih hun chu vawiin tlai dar 4 khan a tawp ta.

Dampa bial bye-election atana campaign theih hun tawp ni hi Pathianni a nih avangin he inthlan chuhtu candidate-te leh political party-te chuan nimin Inrinni khan campaign an khar fel a. Dampa bial chuan hnuai a khaw lian ber West Phaileng leh chuan chung khaw lian ber Reiek-ah te campaign kharna hun pui ber an hman a. Hnam tlem zawk awmna khaw lian ber Silsury khua-ah pawh nimin leh Zirtawpni a campaign kharna hun hmangin khaw dang dangah pawh nimin khan hun hman a ni bawk a. Hei bakah hian nimin khan rorellai ZPM, Congress leh MNF-te chuan media kal tlanga Dampa bial mipuite vote tura ngenna atan Aizawlah chanchinbumite an kawm bawk a ni. Vawiin tlai Dar 4 atang khan vote zawn phal a nih tawh loh avangin 'silent period' an tih mai chu a intan a. Thawhleghi tlai lama vote thlak zawh a nih hma chuan engti kawng mah a vote zawn phal a ni tawh lo a ni.

He mi chungchangah hian Election Commission of India-in kaihhruaina a siam angin vote zawn khap a nih tawh bakah Dampa assembly bial pawn atanga

campaign tur a kal, he biala vote nei si lo te chuan Dampa bial hi an chhuahsan tawh tur a ni a. Aurinna hman phal a ni tawh lova, District Magistrate in khapna thupek a chhuah chu zawm vek tur a ni. The Representation of the People Act, 1951 Section 126 (1) (b) in a sawi angin electronic media/social media leh a tlukpui dangte'n inthlan kaihhnawih, mipui rilru sukthlek tidanglam thei thil an chhuah phal a ni lova. Dan zawmlo te chu kum hnih thleng lungin tan emaw, pawisa chawi emaw, pawl chawi leh lungin tang tur emaw hrem theih an ni ang.

Inthlan ni leh a hma Thawhtanni-a print media a political advertisement chhuah tur te chuan Media Certification & Monitoring Committee (MCMC) phalna an lak angai a, Candidate emaw Party tinin emaw chi leh chi, sakhuana, hnam leh hnam inkar boruak tichhe thei lam hawiin engmah tih loh tur a ni a. Vote hmuh theihna turin chi leh chi inkar boruak tichhe thei zawngin engmah tih phal anilo bawk.

(Desk)

<><><>

BYE-POLL PREP

Dampa bial by election naktip Thawhlehi a vote thlak tura inbuatsaihna-ah polling station hla zual 6 a inthlan buaipuitu tur (polling party) te chuan an duty na tur hmun tukin zing khan an pan.

Dampa bial ah hian polling station 41 awmin chung zinga polling station 6 - Silsury khua a polling station 3, Zopui, Hnahva leh Lianbuang a duty tur polling official-te an kal chhuak a. Polling station dang 35 a duty turte chuan naktukah inthlan bungraw famkim nen Mamit an chhuahsan thung ang. Hmun hla leh kal harsatna hmun a duty turte hian tukin dar 9 khan Mamit DC complex Election Office kawt atangin lirthei 18 hmangin an chhuak a ni. Mamit Election Officer Pu Lalnunfela Chawngthu chuan Dampa bial bye-election a polling station hla zual 6 a inthlan buaipuitu tur (polling parties) te leh critical polling station 3 - Silsury 1, 2, 3 a venhimna lam a duty tur CAPF section 3 te chuan lirthei 18 hmangin tukin dar 9 khan an duty na hmun tur panin an chhuak , tih sawiin polling station dang 35 a duty turte chu naktuk ah lirthei 39 hmangin an kal ve leh thung dawn a ni a ti.

Byte: Election officer Pu Lalnunfela Chawngthu.

Naktuk tlai-ah chuan polling party 41 zawng zawngin an duty-na tur khua theuh an thleng kim tawh ang. Dampa bial bye-election atana inbuatsaihna-ah hian nimin khan general observer Pu M.T Reju kaihhruaina hnuai-ah, Mamit bawrsap pisa-ah a hnunung ber atan khawl hmanga thliarfel a ni a. Polling official-te tan nimin vek khan a vawi thumna leh tawp berna atana training buatsaih a zawhfel a ni. Hemi hma lam hian inthlanna atana hman tur EVM leh VVPAT khawlte chu endik a, hman theih turin a khawl siamtu ECIL company mithiamte'n EVM leh VVPAT 82 ve ve chu an pawm fel vek a, hmun himah venhimna hnuai a dahfel a lo ni tawh bawk a ni.

Jt. chief electoral officer Pi Ethel Rothangpui'n Akashvani News a hrilh danin polling station 41 zinga 40-ah hian webcasting tih vek a ni dawn a. Lirthei hmanga kal theih loh, ke chauhva thlen theih awm chhun Zopui polling station-ah chuan electric a la luh loh avangin inthlan vote thlak lai hi webcasting a tih ve theih dawn lohva, chuvangin video hmanga thlalak a ni dawn a ni.

(RD Darthanzauva, PTC Mamit/Desk)

<><><>

MCC VIOLATION

Thawhlejni a Dampa bial bye-election lo awm tura vote an zawnna a chief minister Pu Lalduhoma'n inthlan dan (election model code of conduct) bawhchhia a puhna hmasa zawk a insawifiahna chu Election Commission of India in a pawmsak lo.

Chief Electoral Officer (CEO) pisa atanga thudawn danin Election Commission hian chief minister-in West Phaileng leh Reiek-a a campaign-na a a thusawi, cheng vaibelchhe 770 senga khaw 15 chawm tur tui khuah a tiam ni a sawi chungchanga insawifiah tura tihna chu ZPM president-in a chhang a. Hei hi zir chian a nih hnu-ah Election Comission thutlukna siam turin thawn thlak a ni a. Election Commission chuan ZPM president sawifiahna chu hnawlin s, Pu Lalduhoma'n inthlan campaign-na a a thusawi chu a dem thu a tarlang bawk a. ZPM party president chu an star campaigner zawng zawng an thusawi fimkhur tawh tur leh Model Code of Conduct bawhchhe tawh lo tura hriattir vek turin a zilhhau a. Hremna lam pang erawh chu ECI hian a sawi ri lo a ni.

He tih lai hian MNF party legal board-in CEO hnena an thu thehluh, Pu Lalduhoma'n November ni 1-a Silsury khua vantlang inkhawm a chi leh chi inhuatna lam zawng a sawi ni a an puhna leh anni lam insawifiahna chu vawiin hian ECI hnenah CEO pisa chuan a thawn thla dawn ni a hriat a ni a. Nimin chawhnu lam khan an insawifiahna hi CEO pisa hian a dawng ni-a thu dawn a ni. MNF legal board chuan Silsury khua-ah hian chief minister hian ram hruiatu hmasate chu Mizote leh Chakma-te inhuatna tur tuhtu-ah a puh niin an sawi a. MNF chu a hmingah Mizo hnam tan chauh a nih thu leh Chakma tana din a nih ve loh thu bakah ZPM chu Zoram a cheng zawng zawng huap a nih thu a sawi niin an puh bawk a ni.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MZP

Red Bull Aizawl Tlangruam buatsaihtu zing ami Yashwi Arora chuan Mizo hnam lam - Cheraw diklo taka a tih bawrhban chungchangah vawiin khan MZP kaltlangin Mizo mipuite hnenah ngaihdam a dil.

Red Bull Aizawl Tlang Ruam 2025 (Urban Downhill Racing) Aizawl buatsaih ah Mizo hnam lam - Cheraw kaihlek chu an pawm theih loh thu MZP bakah Art & Culture department, Mizo Cultural Organisation (MCO) leh Mizo Culture Artist te'n an lo sawi tawh a. Hemi chungchangah hian MZP chuan a mawhphurtu zawn chhuah tumin hma an la nghal a. A mawhphurtu ber Content Creator pakhat Yashwi Arora, Red Bull India Producer chu, Mizo hnam lam - Cheraw ti bawrhbang zawnga hmalatu a ni tih hriat chhuah a ni a. He a thiltih avang hian MZP chuan Mizo mipuite hmaah ngaihdam dil turin an phut a ni.

Yashwi Arora hian Mizoram chhuahsan tawh mah se, lehkhah ziakin Mizoram mipuite laka thupha a chawina hi MZP kaltlangin a rawn thawn a ni.

(Corr)

<><><>

BIHAR ELECTIONEERING

Bihar assembly inthlan thawh hnihna neih tur atana campaign theih hun, wawiin tlai dar 6-ah khan a tawp a, naktip-ah district 20 huamchhunga assembly bial 122-ah vote thlak a ni ang. Campaign theih hun tawp dawn thlengin party tinte, thahnemngai lehzualin an campaign a, tangrual pawl lian pahnih, NDA leh Mahagath Bandhan-te chuan assembly bial hrang hrangah vantlang inkhawm an buatsaih a ni.

BJP hruaitu senior, union minister Amit Shah, Rajnath Singh, Shivraj Singh Chouhan leh hruaitu pawimawh dangten vantlang inkhawm hrang hrangah thu an sawi a, Cong hruaitu senior, Rahul Gandhi-a pawhin Kishanganj leh Purnea-a vantlang inkhawmah thu a sawi a ni.

Janata Dal (United) President, Chief Minister ni bawk, Nitish Kumar-a chuan a hun chhungin kawlphehtha lamah state-in nasa takin hma a sawn tih sawiin state chhunga cheng-ten a thlawnin kawlphehtha unit 125 an dawng mek a ni, a ti a, NDA thlan tlin leh anih chuan hmasawnna hna, chak zawkin kalpui a ni ang, a ti bawk.

Mahagathbandhan-in Chief Minister atana an thehchhuah, Tejashwi-a chuan thla 17 chhung chauh Chief Minister nihna a chelh lai khan thalaite tan sorkar hna nuai 5 a siam sak tih, Kaimur-a vantlang inkhawm neihah a sawi a, thlan tlin leh anih chuan sorkar hna thawk awm lohna chhungkua zawng zawngah sorkar hna pakhat theuh pek an ni ang, a ti.

(NSD)

<><><>

C’WEALTH PARLIAMENTARY CONF.

Commonwealth Parliamentary Association, India Region Zone-III Annual Conf. wawi 22-na chu naktuk hian Kohima-ah Lok Sabha Speaker Om Birla-a’n a hawng dawn a, tun hi Nagaland-a a kal wawi khatna tur a ni.

Hawnna inkhawmah hian midang bakah Nagaland Chief Minister, Neiphiu Rio, Rajya Sabha Dy. Chairman Harivansh Narayan Singh-a leh Nagaland Legislative Assembly Speaker, CPA India Region Zone-III Chairman ni bawk, Sharingain Longkumer-a te an tel ang.

Ni hnih awh tur he khawmpuiah hian Presiding Officer leh Parliament member te bakah, hmarchhak state 8 Legislative Assembly member-te an tel dawn a, thupui hrang hrang zirho a ni dawn a ni.

(NSD)

<><><>

